

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 51. Pravilnika o licencama – Prečišćeni tekst ("Službeni glasnik BiH", broj 63/16), na sjednici Državne regulatorne komisije za električnu energiju, održanoj 9. novembra 2021. godine, donijeta je

## **ODLUKA**

### **O SUSPENZIJI LICENCE ZA OBAVLJANJE DJELATNOSTI MEĐUNARODNE TRGOVINE ELEKTRIČNOM ENERGIJOM**

1. Suspendira se licenca za obavljanje djelatnosti međunarodne trgovine električnom energijom, izdata pravnom licu "LE Trading BH" d.o.o. Banja Luka Odlukom broj 05-28-12-192-22/20 ("Službeni glasnik BiH" broj 48/20), zbog naročitih kršenja odredbi uvjeta za korištenje licence.
2. Licenca iz tačke 1. ove Odluke se suspendira od 9. novembra 2021. godine do daljnjeg.
3. Ova Odluka stupa na snagu danom donošenja, a njen dispozitiv bit će objavljen u "Službenom glasniku BiH" i službenim glasilima entiteta.

### **Obrazloženje**

Pravnom licu "LE Trading BH" d.o.o. Banja Luka (u daljnjem tekstu: vlasnik licence) je Odlukom Državne regulatorne komisije za električnu energiju (u daljnjem tekstu: DERK) broj 05-28-12-192-22/20 od 28. jula 2020. godine, izdata licenca za obavljanje djelatnosti međunarodne trgovine električnom energijom za period od 1. septembra 2020. godine do 31. augusta 2025. godine.

Operator za obnovljive izvore i efikasnu kogeneraciju Federacije Bosne i Hercegovine je dopisom broj 02-1-2020-1/21 od 27. oktobra 2021. godine obavijestio vlasnika licence, DERK i Regulatornu komisiju za energetiku Republike Srpske o blokadi računa vlasnika licence, zbog neizvršenja plaćanja preuzetih obaveza prema Ugovoru o uređenju međusobnih odnosa.

Nezavisni operator sistema u Bosni i Hercegovini (NOS BiH) je dopisom broj 1217-1/21 od 28. oktobra 2021. godine obavijestio DERK da je istog dana vlasnik licence na određeno vrijeme isključen sa tržišta električne energije u Bosni i Hercegovini, zbog neispunjavanja finansijskih obaveza prema NOS-u BiH, a koje su definirane Tržišnim pravilima, Ugovorom o balansnoj odgovornosti i relevantnim odlukama DERK-a.

Pored navedenog, Odlukom o izdavanju licence za djelatnost međunarodne trgovine električnom energijom broj 05-28-12-192-22/20 od 28. jula 2020. godine je propisano da je vlasnik licence u obavezi plaćati regulatornu naknadu u periodu važenja licence, na način i u rokovima utvrđenim posebnim aktom. Rješenjem o plaćanju regulatorne naknade za 2021. godinu broj 05-28-12-308-21/20 od 9. decembra 2020. godine, vlasniku licence je naloženo plaćanje regulatorne naknade za 2021. godinu u ukupnom iznosu od 26.000,00 KM, koji iznos se plaća kvartalno unaprijed, u četiri jednaka dijela od po 6.500,00 KM. S tim u vezi, navedenim Rješenjem je propisano plaćanje regulatorne naknade za I kvartal 2021. do 31. januara 2021. godine, za II kvartal do 31. marta 2021. godine, za III kvartal do 30. juna 2021. godine, te za IV kvartal 2021. godine do 30. septembra 2021. godine. Međutim, vlasnik licence nije postupio po navedenom Rješenju i ispunio obaveze prema DERK-u u pogledu plaćanja regulatorne naknade za IV kvartal 2021. godine.

Vlasnik licence se nije očitovao po pitanju ispunjavanja naprijed navedenih obaveza. Međutim, 28. oktobra 2021. godine obratio se zahtjevom za ukidanje licence za obavljanje djelatnosti međunarodne trgovine električnom energijom, registracijskog broja 05-28-12-192-23/2. Kako u vezi sa podnijetim zahtjevom nije izvršena uplata naknade za obradu istog, propisana Odlukom o visini jednokratne naknade za provođenje postupka u skladu sa Pravilnikom o licencama ("Službeni glasnik BiH", br. 41/13 i 17/16), vlasnik licence je upoznat sa obavezom uplate, ali kako uplata do dana donošenja ove Odluke nije izvršena, zahtjev za ukidanje licence nije se mogao smatrati kompletnim.

Tačkom 2.1. Standardnih uvjeta za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16) propisano je da je vlasnik licence dužan u toku korištenja licence permanentno zadovoljavati opće i specifične kriterije utvrđene Pravilnikom o licencama na osnovu kojih mu je licenca izdata i podnositi DERK-u odgovarajuće dokaze o tome. Jedan od općih kriterija za donošenje odluke o izdavanju licence, propisan članom 26. Pravilnika o licencama – Prečišćeni tekst, jesu ekonomske i finansijske sposobnosti podnosioca zahtjeva.

U konkretnom slučaju, sve iznijete činjenice dovoljan su osnov za ocjenu da trenutno izostaje finansijska sposobnost vlasnika licence da obavlja licenciranu djelatnost, odnosno da su u pitanju naročita kršenja odredbi uvjeta za korištenje licence. Imajući u vidu da je članom 51. stav 8. Pravilnika o licencama – Prečišćeni tekst, propisano da se u navedenom slučaju licenca suspendira bez obavljanja javne rasprave, to je, na osnovu člana 51. stav 7. pomenutog Pravilnika, odlučeno kao u dispozitivu ove Odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-14-2-165-11/21  
9. novembra 2021. godine  
Tuzla

Predsjedavajuća Komisije  
Branislava Milekić